

TURISM E CULTURA

La Cianzon de Val de Fascia te n video

N prodot realisà da l'Istitut Cultural Ladin vegn dat fora con la colaborazion de l'APT per ge fèr cognoscer noscia identità ence ai ghesc. L vegn prejentà en lunesc a l'aperitif te Museo



Una de la feures del video, che è a la leta sun na chief Usb te Musel Ladin.



Dut l'è peà via da chel test poetich scrit da Francesco Dezulian del Garber del 1941 per recordèr con encresciujum, canche l'era a la foresta, sia doucia val de Fascia. N test che duc i fascegn cognosc per l'aer sentù cianter apontin desche «La Cianzon de Val de Fascia» o ence con la pruma paroles: «Ló che i pré» e che pean via da na musega tradizionèla de la Frisia che ge aea dat l'ispirazion a Francesco del Garber l'à abù ti egn n muie de interpretazions e esecuzions desferentes.

Chest test ge era ruà te man ence al muzist e componist da Moena Luigi Canori, che con autertanta pascion e sapienza l'aea fornì de na melodia duta neva e piena de sugestion.

Ades paroles e musega se à regolà de feures ciarièdes de significat

per creèr n video dassen da encant, tant per la jent ladina, che se recognosc ti sentimenc e ti recorrc de Francesco del Garber, che per la jent che rua chiò en feries, e che pel descorir la beleza de noscia val, l'emozion soscedèda da la musega e la paroles ladines tel test.

Test, musega e retrac porta dant i elemenc che caraterisea la jent ladina de Fascia, sia identità de comunanza leèda dal cher a si teritorie, a sia storia e a si lengaz.

La composizion se spartesc te cinch moments musicai che vegn un dò l'auter beleche en foja de suite, dessegnan na cornisc de emozions dò e dò desferentes che fèsc restèr senza fià. La maor carateristica de Fascia, sia identità ladina, vegn al luster dessema con sia capacità amò feruscola de produjer cultura tant tel ciamp de la lettradura che de la

musega. L video moscia la val con sia desvaliva carateristiches de ambient e de colores che muda fora per la sajons de l'an e de la vita.

L raprejenta donca dassen n biliet da vijita per i ghesc de la val, per descorir o recordèr chesta tera no demò ti tempes e ti lesc segnè dal turism de massa, ma ence, per la dir con l'autor, «lò che se pel goder pasc de paradìs, lò l'è Val de Fascia, lò l'è mie paisc».

L filmat, con sotetitoi per talian, todesch e ingleis, l'è a la leta te Museo Ladin a Sèn Jan te na belota chief USB, portèda dant e realisèda en colaborazion con l'APT Fascia.

Chest nef prodot de l'Istitut Cultural Ladin vegn prejentà te Museo en lunesc ai 29 de messèl da les 17.30 en ocajion de l'aperitif al Museo.